

KALATAS

OPISYAL NA PAHAYAGAN NG REBOLUSYUNARYONG MAMAMAYAN
NG TIMOG KATAGALUGAN

TOMO 28 BLG. 1

Basahin at Talakayin

ENERO - MARSO 2000

EDITORIAL



Paigtingin ang Pakikidigmang Gerilya !

Tuluyan nang nahiwalay ang naghaharing pangkating Estrada. Isinusuka na ng sambayanang Pilipino ang mga anti-mamamayan at anti-demokratikong kampanya at patakaran nito. Hindi na kayang itago ng pagbabagong-bihis ni Estrada ang bulok at pasistang katangian ng papet na rehimen. Tulad ng inaasahan, mabilis ang pagbulusok ng ekonomya ng bansa bunga ng tila alipin niyang pagsunod sa dikta ng

amo niyang imperyalismong US upang ipataw ang mga karumal-dumal na patakaran ng denasyunalisasyon, liberalisasyon, pribatisasyon at deregulasyon. Sa kumpas ng “globalisasyon”, todo-todong ibinukas ni Estrada ang ekonomya sa ganid-sa-tubong mga dayuhang kapitalista. Sa ilalim ng rehimeng US-Estrada, batbat ng pagdurusa ang masang anakpawis.

Sundan sa kasunod na pahina ►

NILALAMAN

- 1** Editorial: Paigtingin ang Pakikidigmang Gerilya!
- 4** Patuloy na Sumusulong ang Rebolusyunaryong Kilusan sa Timog Katagalugan!
- 11** Bigo Ang OpMak!
- 13** Pagsulong sa Gitna ng Matitinding Operasyong Militar
- 19** Patuloy ang mga Matitinding Paglabag sa Karapatang Pantao ng Rehimeng US-Estrada
- 22** Pinarusahan si Mayor Aldaba
- 23** Ipinakikilala: ang Alab ng Digmang Bayan
- 24** Balita
- 24** Teka-teka

Ang KALATAS ang opisyal na pahayagan ng rebolusyunaryong mamamayan ng Timog Katagalugan. Pinapatnubayan ito ng Marxismo-Leninismo-Maoismo. Inilalathala ito ng Partido Komunista ng Pilipinas (MLM) at ng Bagong Hukbong Bayan ng Timog Katagalugan.

Inaanyayahan ng Pamatnugutan ang mga mambabasa na mag-ambag sa pagpapahusay ng ating pahayagan. Magpadala ng mga komentaryo at mungkahi, balita at rebolusyunaryong karanasan na maaaring ilathala sa ating pahayagan.

Maaaring makuha ang pinakahuling isyu ng ating pahayagan sa internet. Magtungo sa

http://members.nbci.com/kalatas_ST/index.htm

Tumatanggap din ng mga liham sa

kalatas_st@yahoo.com

◀ *Mula sa nakaraang pahina*

Bulok sa kaibuturan ang reaksyunaryong estado. Napakasahol ng korupsiyon at nepotismo sa burukrasya. Nangunguna sa pagwawaldas sa kabang-yaman ng bansa ang maraming pamilya, mga kamag-anak at kroni ni Estrada. Buwis ng mamamayan ang ipinantutustos ni Estrada sa mga luho at layaw ng kanyang mga kerida. Sangkot ang mga kaibigan niyang politiko at negosyante sa mga maanomalyang transaksyon, iligal na negosyo, sugal, pagpupuslit ng bawal na gamot at gawain ng mga sindikatong kriminal.

“...sa bawat paghigpit ng kontra-rebolusyunaryong dahas, dapat nating tugunan ito ng ibayo pang pagpapaigting ng armadong rebolusyon.”

Tumitindi ang alitan sa pagitan ng mga naghaharing uri. Nagkukumahog sila sa pag-aagawan sa natitirang yaman ng bansa. Walang habas namang kinakabig ng mga pinapaborang kaibigan ni Estrada ang lahat ng pang-ekonomya at pampinansyang ganansya. Nangunguna rito ang tulad ng mga pamilya Marcos at Lopez, nina Eduardo Cojuangco, Lucio Tan at Dante Tan

Tumitindi ang pagkasuklam ng mamamayan sa rehimeng US-Estrada bunga ng mga atakeng ginagawa nito sa kanilang kabuhayan at karapatan. Sagad na ang kanilang pagtitiis kung kaya't nagkakaisa sila upang labanan ang pasistang postura at pagpapanggap na maka-mahihirap ni Estrada. Isang manipestasyon nito ang pagbagsak ng popularidad ni Estrada sa mga isinagawang sarbey kaugnay dito. Lubhang ininda ito ni Estrada sapagkat sa isang artistang katulad niya, isang malaking bangungot ang paglalaho ng kinang ng kanyang popularidad.

Napilitang iurong ni Estrada ang balaking pagbabago ng reaksyunaryong konstitusyon matapos itong salubungin ng malalaking protesta. Maging ang mga

Sundan sa kasunod na pahina ▶

◀*Mula sa nakaraang pahina*

reaksyunaryong anti-Estrada ay nakikisakay sa mga pakikibakang inilulunsad ng mga makabayan at progresibong pwersa.

Ang pagbagsak ng popularidad ni Estrada ay dulo lamang ng isang napakalaking batong uumpog sa kanyang ulo. Sa hinaharap ay sasalubong sa kanya ang namumuonang galit ng sambayanan. Ngayon pa man ay may lumalakas nang popular na panawagang patalsikin si Estrada sa pwesto.

Mahigpit namang tinanganan ng rebolusyunaryong kilusan ang obhetibong kalagayan upang ibayo pang makapagpalakas at makapagpalawak. Sa nakaraang taon, nagpatuloy ang pagtaas ng bilang ng kasapiang ng Bagong Hukbong Bayan. Matitindi at humatak ng atensyon ng midya ang mga inilulunsad na taktikal na opensiba sa iba't ibang rehiyon.

Ang Timog Katagalugan ang isa sa mga rehiyong nagbandila ng pagsulong ng rebolusyon sa larangan ng ideolohiya, pulitika at organisasyon. Mapagpasya nitong binigo ang desperadong pakanang Oplan Makabayan (OPMAK) ng rehimeng US-Estrada. Ibayo pang pinaigting ang pakikidigmang gerilya habang umaani ng papalakas at papalawak na baseng masa. Sa buong 1999, nakapaglunsad ang rehiyon ng may kabuuang 79 na matatagumpay na taktikal na opensiba.

Malawakang inilantad at mariing kinondena ng rebolusyunaryong kilusang masa sa mga kalunsuran at sentrong bayan ang OPMAK at papatinding karahasang inihahasik ng rehimeng US-Estrada sa mamamayan. Paparaming bilang ng masang anakpawis at panggitnang pwersa ang aktibong lumalahok sa mga inilulunsad na mobilisasyong masa.

“Kailangang maglunsad ang BHB ng maraming taktikal na opensiba upang papanagutin ang mga buhong sa kanilang krimen sa mamamayan.”

Inaasahan natin na iigting pa ang kontra-rebolusyunaryong dahas ng reaksiyunaryong estado upang sagkaan ang pagsulong ng rebolusyon. Matindi ang naranasang pananalakay ng rehiyon sa kamay ng pasistang militar sa ilalim ng OPMAK. Subalit nabigo nitong durugin ang rebolusyunaryong kilusan. Katulad ng mga nakaraang kampanya ng pasistang estado, pinatindi lamang nito ang galit ng masa sa naghaharing rehimen. Kahit pa nagpapakana na naman si Estrada ng bagong kontra-rebolusyunaryong kampanyang militar na COPLAN Balangai, makatitiyak tayong mabibigo ito.

Sa paglala ng pang-ekonomiya at pampulitikang krisis, mas patitindihin ng rehimeng US-Estrada ang pandarahas at panghahati nito sa hanay ng mamamayan. Kaya nga sa bawat paghigpit ng kontra-rebolusyunaryong dahas, dapat nating tugunan ito ng ibayo pang pagpapaigting ng armadong rebolusyon.

Sa maraming larangang gerilya na nasagasaan ng Opmak, sumisigaw ng katarungan ang masa sa mga paglapastangang ginawa ng pasistang militar sa kanilang karapatan. Nararapat lamang na tugunin ito ng rebolusyunaryong kilusan. Kailangang maglunsad ang BHB ng maraming taktikal na opensiba upang papanagutin ang mga buhong sa kanilang krimen sa mamamayan.

Tugunin natin ang panawagan ng tagapangulong Armando Liwanag sa kanyang mensahe sa ika-31 anibersaryo ng BHB:

“Kahit sinasabi natin na ang kaaway ay estratehikong mas malakas kaysa atin sa usaping militar at kailangang isagawa natin ang estratehikong depensiba, dapat nating ilunsad ang mga batayang taktikal na opensiba sa layuning makasamsam ng mga armas mula sa kaaway at makatipon ng lakas. Para sa layuning ito, ang hukbong bayan ay sumasalig sa pagsulong ng gawaing masa.”

Ang paglakas at paglawak ng pakikibakang masa sa kanayunan at kalunsuran ay humihingi ng katugong paglakas ng armadong pakikibaka. Dapat tayong magpursige sa malaganap at masinsing pakikidigmang gerilya habang umaani ng papalawak at papalalim na baseng masa.

Sa layuning ito, mahigpit nating tiyakin ang magkatuwang na pagsusulong ng armadong pakikibaka, rebolusyong agraryo at pagbubuo ng baseng masa. Ang tatlong mahahalagang sangkap na ito ng demokratikong rebolusyon ng bayan ang magtitiyak ng pagtahak ng rebolusyon sa wastong direksyon. **K**



Patuloy na Sumusulong ang Rebolusyunaryong Kilusan sa Timog Katagalugan



na sumulong ang armadong pakikibaka, naipagtagumpay ang paparaming bilang ng pakikibakang agraryo at ibayong napalakas ang baseng masa ng rebolusyon. Sa ganito, muling nakapagbigay ng malaking ambag ang rehiyong Timog Katagalugan sa pambansang pagsisikap na

Maituturing nang nabigo ng rebolusyunaryong kilusan sa Timog Katagalugan ang Oplan Makabayan (OpMak) ng rehimeng US-Estrada. Patunay nito, mula ikalawang hati ng 1995, nasustine ng rebolusyunaryong kilusan ang momentum ng lahatang-panig na pagsulong ng rebolusyon sa rehiyon sa harap ng pinakamalaking pakat ng pasistang tropang militar sa kasaysayan ng rehiyon.

Naigpawan na ng rebolusyunaryong pwersa ang mga pansamantalang kahirapang idinulot ng pagbabago ng sitwasyong militar sa rehiyon. Sa gabay ng IDKP at sa pamamagitan ng mahigpit na pagtangan sa mga prinsipyo at taktika ng pakikidigmang gerilya, patuloy

maisulong ang rebolusyon sa bago at mas mataas na antas.

Sa kabila ng walang habas na pasistang pananalakay ng mahigit 13 batalyong tropa ng kaaway sa lahat ng probinsya ng rehiyon, wala ni isa mang sona o larangang gerilya ang “natiris” ng kaaway. Sa kabilang banda, ilang beses na hinambalos ng BHB ang ulo ng pasistang halimaw, bukod pa sa sanlaksang sugat na nilikha sa katawan nito. Nitong nakaraang taon, muling tinanganan ng rehiyong Timog Katagalugan ang pulang bandila sa paglulunsad ng mga taktikal na opensiba sa buong bansa.

Sundan sa kasunod na pahina ►

◀ *Mula sa nakaraang pahina*

Napakagandang pasalubong ito sa bagong milenyo, ang milenyo na magbabadya ng ibayong pagsulong at pagsigabo ng mga kilusan para sa pambansang pagpapalaya at sosyalistang rebolusyon.

Subalit hindi pa tapos ang laban. Kailangan pang ganap na malupig ang Oplan Makabayan at itaboy na talunan ang tropang militar. Higit pa, tulad ng panawagan ng Komiteng Rehiyon ng Partido Komunista ng Pilipinas sa Timog Katagalugan, kailangang higit pang paigtingin ang pakikidigmang gerilya upang maisulong sa bago at mas mataas na antas ang rebolusyon.

Bigo ang Oplan Makabayan

Sumulong ang lahat ng larangan ng mga rebolusyunaryong gawain para sa taong 1999 sa harap ng batas militar na ipinatutupad ng rehimen sa rehiyon. Nasustine ng rebolusyunaryong kilusan ang momentum nito ng pagsulong na nasimulan noong 1995, nang magsimulang kumambyo pasulong ang rebolusyong kilusan bunga ng pagpapatupad ng IDKP.

Subalit ang dapat na bigyang pansin dito ay ang katotohanang naipagpatuloy ang pagsulong sa gitna ng bata-batalyong panagupa ng kaaway na walang tigil na sumasalakay sa lahat ng mga sona at larangang gerilya sa rehiyon.

Matatandaang nagsimulang humina ang rebolusyunaryong kilusan noong huling mga taon ng dekada 80. Hindi pa dulot ng mga operasyong militar ng

kaaway kundi sanhi ng panloob na mga pagkakamali. Lumihis ito sa wastong linya ng pagsusulong ng rebolusyon. Ipinatupad nito ang maling linya ng maa-gang regularisasyon at insureksyon. Subalit tatlong taon lamang mula nang ilunsad ang IDKP noong 1992, napigil na ng rebolusyunaryong kilusan ang padron ng paghina. Higit pa, naikambyo na nito pasulong ang lahat ng linya ng rebolusyunaryong gawain. Mula 1997, dramatiko nang sumusulong ang rebolusyunaryong kilusan sa Timog Katagalugan.

Kaya naman sa pag-upo pa lamang ni Estrada sa pwesto ng kapangyarihan, sinimulan na nitong ipatupad ang pakanang OpMak at itakdang pangunahing target ng nasabing oplan ang rehiyong Timog Katagalugan. Bagay sa kumikilala sa mabilis na pagsulong ng rebolusyunaryong kilusan sa rehiyon.

Mula kalagitnaan ng 1998 hanggang sa kasalukuyan, sinasaksihan ng mamamayan ng Timog Katagalugan ang pagdadagsa ng rehimeng US-Estrada ng paparaming tropang militar sa rehiyon. Mula sa dalawang batalyon na nakapakat sa timog Quezon at dalawang Marine Batallion Landing Team sa Palawan, umaabot na ang mga ito sa unang kwarto ng taong 2000 sa 13 batalyon ng regular na tropang panagupa ng kaaway na nakapakat sa lahat ng probinsya ng rehiyon. Labas pa rito ang mga panrehiyon at pamprobinsyang tropang panagupa ng PNP at mga kompanya ng CAGU Active Auxillary (CAA). Pinakahuling idinagdag sa mga tropang panagupa ng kaaway ang 1st IBPA na ibinase sa Laguna. Animo'y may batas militar na pinairal ang rehimen sa buong rehiyon.

Kasabay nito, gimbal na nasaksihan at naranasan ng mamamayan ang biglang pag-imbulog ng bilang ng mga karahasang dulot ng militarisasyon laluna sa kanayunan (*tingnan ang kaugnay na balita sa pahina 19*).

Subalit hindi lamang nasalag ng rebolusyunaryong kilusan ang pinakahuling desperadong pakana ng pasistang rehimen. Matapos ang panimulang mga kahirapan at sakripisyo dulot ng pag-angkop sa bagong sitwasyong militar, magiting na nalampasan ng rebolusyunaryong pwersa ang mga kahirapang dulot ng OpMak. Naipagpatuloy ang pagsulong ng kilusan sa harap ng hibang na pagtatangka ng reaksiyunaryong rehimen na sagkaan at durugin ito.

Sundan sa kasunod na pahina ▶

“Matapos ang panimulang mga kahirapan at sakripisyo dulot ng pag-angkop sa bagong sitwasyong militar, magiting na nalampasan ng rebolusyunaryong pwersa ang mga kahirapang dulot ng OpMak.”

◀Mula sa nakaraang pahina

Ilang katotohanan ang makikita sa karanasang ito. Nabinyagan na sa apoy ng rebolusyunaryong pakikibaka ang IDKP, at maningning na pumasa ito sa matinding pagsubok. Pinatutunayan ng karanasan ang katumpakan ng IDKP. Sa gabay ng IDKP, naharap at nalampasan ng rebolusyunaryong kilusan ang determinadong kampanya ng pagsugpo ng kaaway.

Muli, pinatutunayan din nito ang pagkabangkarote ng kritika ng mga paksyunalista't isplitista hinggil sa IDKP. Nananatiling ang wastong linya ng pagsusulong ng rebolusyon ay sa pamamagitan ng subok nang istrategiya ng matagalang digmang bayan sa pamamagitan ng pakikigmang gerilya.

Pinatutunayan ng karanasan na wasto ang pagsusuri ng Partido na walang kauwian ang OpMak kundi ang pagkabigo. Matutulad rin ito sa iba pang kampanyang militar na desperadong iniharang ng mga nakaraang rehimen sa di-mapipigilang martsa ng rebolusyon. Bulok ang pampulitikang pundasyong tinutuntungan nito. Malinaw sa mamamayan na ito'y kampanya ng pagsupil sa kanila upang makapanatili sa kapangyarihan at makapagpatuloy sa pagsasamantala ang naghaharing uri. Sa kabilang banda, patuloy na lumalakas ang rebolusyunaryong kilusan sapagkat naglilingkod ito sa interes ng mamamayan at taglay nito ang wastong linya at matibay na kapasyahang ipagtagumpay ang rebolusyon.

Pinatutunayan ng pinakahuling pangyayaring ito na hindi kayang pigilan ng reaksyunaryong estado ang martsa ng rebolusyon hanggang sa tagumpay. Tunay nga na ang bagong milenyo ay nakalaan para sa mga rebolusyunaryo, para sa bagong lipunang nakabatay sa tunay na demokrasya, kalayaan at kasaganaan para sa mamamayan.

Muli nauulit ang lohikang tinutungo ng lahat ng reaksyunaryo na sinuma ni Kasamang Mao sa ganito: "Manggulo, mabigo..., muling manggulo, muling mabigo..., muling manggulo hanggang tuluyang

bumagsak...". Sa kabilang banda, ang maaliwalas na landas na tinatahak ng lahat ng mga rebolusyonaryo, ng lohika ng kanilang rebolusyunaryong optimismo na kanya ring sinuma sa ganito: "Makibaka, mabigo..., muling makibaka, muling mabigo..., muling makibaka hanggang ganap na magtagumpay...".

Mga Tagumpay

Malalaking tagumpay ang nakamit ng rebolusyunaryong kilusan sa rehiyon noong 1999. Dobleng tagumpay dahil napagpunyagian ito ng rebolusyunaryong pwersa sa harap ng militarisasyong inilatag ng rehimen sa buong rehiyon.

Ayon sa pinakahuling pagtatasa ng komiteng rehiyon ng Partido sa Timog Katagalugan, ang pinakamalaking tagumpay ay ang nasustineng momentum ng pagsulong ng rebolusyunaryong kilusang masa sa kanayunan sa gitna ng mararahas na pagsalakay ng mga pasistang tropa ng rehimen. Bunga nito, higit na napasigla ang rebolusyong agraryo at ang paglulunsad ng mga taktikal na opensiba. Gayundin, nagpatuloy ang sigla ng ligal na demokratikong kilusan sa mga kalunsuran at kabayanan ng rehiyon. Dulot nito, muli na namang nadagdagan ang lakas at di-matatawarang karanasan ng baseng masa ng rebolusyon sa rehiyon.

Sa nakaraang taon, may naitalang 42 iba't ibang tipo ng pagkilos para sa rebolusyong agraryo sa anim na lalawigan. Doble ang bilang na ito kumpara sa 1998. Nabiyayaan nito ang 1,269 indibidwal at 960 pamilya ng mga magsasaka.

Ang mga pinakamaraming tipo ng aksyon ay okupasyon, posisyon, pagtanim ng mga pagkaing butil lalo na sa mga tiwangwang na lupa, abandonadong pastuhan at mga tubuhang pagmamay-ari ng mga malalaking panginoong maylupa. May narehistro ring mga pakikibaka para sa pagpapataas ng sahod ng

Sundan sa kasunod na pahina ▶

*"Nakapaglunsad
din ang Melito
Glor Command ng
Bagong Hukbong
Bayan ng 79 iba't
ibang tipo ng mga
batayan at ispesyal
na taktikal na
opensiba noong
nakaraang taon."*

◀Mula sa nakaraang pahina

manggagawang bukid, pagpapababa ng resikada at laban sa pagpapalayas.

Panibagong dagdag ito sa mga nauna nang naipagtagumpay na pakikibakang agraryo sa nagdaang mga taon na hanggang ngayon ay pinakikinabangan pa ng mga benepisyaryo.

Nagpatuloy din ang masiglang pagtatayo ng mga grupong suyuan na nagsisilbing paraan ng mga magsasaka upang makatipid sa gastos sa produksyon habang pinasisigla ang kooperasyon sa kanilang hanay.

Mas marami rin ang naging pagkilos ng rebolusyunaryong mamamayan hinggil sa iba't ibang

***"Sa halip na madurog,
nadagdagan pa ng
rebolusyunaryong kilusan
ang mga sona at larangang
gerilya sa rehiyon."***

usaping lokal na nakaaapekto sa kanila, kalakhan laban sa lumulubhang militarisasyon at pasismo. Kabilang dito ang mga rali-demonstrasyon mula lokal hanggang pambansang antas, martsa-libing, at mga pagkilos para sa kagalingan ng mamamayan.

Hindi nagawang pigilan ng militarisasyon sa kanayunan ang marubdob na pakikibaka ng mga magsasaka para sa lupa at kabuhayan. Manapa, lalong naglagablab ang diwang mapanlaban sa mga magsasaka dahil higit nang malinaw kaysa sa nakaraan ang tunay na pinaglilingkuran ng ipokrito at militaristang rehimeng US-Estrada. Higit nang malinaw na, tulad ng dati, wala talaga silang ibang aasahan kundi ang sarili nilang lakas. Walang ibang nagtataguyod sa kanilang interes kundi ang rebolusyunaryong kilusan.

Bunga ng mga rebolusyunaryong pakikibakang ito, patuloy na dumami at lumaki ang organisadong masa ng rebolusyon sa buong 1999. Lumaki ito ng 72 porsyento kumpara sa bilang nito noong 1997.

Malayong lampas na ito sa pinakarurok na inabot na bilang ng organisadong masa ng rebolusyon noong kalagitnaan ng dekada 80.

Sa halip na madurog, nadagdagan pa ng rebolusyunaryong kilusan ang mga sona at larangang gerilya sa rehiyon. Nasasaklaw na ngayon ng mga sona't larangang gerilya ang halos buong rehiyon.

Nakapaglunsad din ang Melito Glor Command ng Bagong Hukbong Bayan ng 79 iba't ibang tipo ng mga batayan at ispesyal na taktikal na opensiba noong nakaraang taon. Nahigitan pa nito ang bilang ng nailunsad na mga taktikal na opensiba noong 1997. Kaya't muli, tulad noong 1997, tinanganan ng Timog Katagalugan ang pulang bandila ng paglulunsad ng mga taktikal na opensiba sa buong bansa.

Pangunahin sa mga ito ang 15 reyd at apat na ambus. Kabilang din sa mga ito ang mga operasyong isnayp, haras, dis-arma, dakip-parusa, pamamarusa at agaw-armas (*tingnan ang kaugnay na lathalain sa pahina 10*). Labintatlo sa mga ito ay maituturing na malalaki at matunog-sa-pulitikang mga taktikal na opensiba. Tampok sa mga ito ang reyd sa mga himpilan ng pulisya sa Pola, Oriental Mindoro noong Nobyembre 1 at sa Dolores, Quezon noong Nobyembre 3; ang pagkakabihag kina P/CI Abelardo Martin, hepe ng pulisya sa Dolores, at Major Noel Buan, *intelligence chief* ng buong SOLCOM; ambus sa mga elemento ng Alpha Coy 76th IBPA sa Padre Burgos, Quezon noong Mayo 25; at pamamarusa kay P/CI Anastacio Labitigan, opisyal ng CMO ng PNP-Quezon, noong Enero 11 sa Sariaya, Quezon.

Sinalubong ng rehiyon ang bagong milenyo ng dalawang matutunog na taktikal na opensiba. Una rito ang matagumpay na pamamarusa sa pusakal na Mayor ng San Teodoro, Oriental Mindoro, si Oscar Aldaba. Si Aldaba ay dating Army Major at *intelligence officer* na may mga utang na dugo sa rebolusyunaryong kilusan at masa. Nagpista ang buong bayan ng San Teodoro sa kanyang pagkamatay dahil matagal na itong hinihiling ng mga mamamayan. Kasunod nito ang matagumpay na ambus sa mga elemento ng 9th SRC sa Mabitac, Laguna nitong Pebrero 15.

Sa mga inilunsad na taktikal na opensiba, nakapaslang ang BHB ng 56 na tropang militar at paramilitar, pulis at ahente sa paniktik, nakasugat ng lima

Sundan sa kasunod na pahina ►

◀ *Mula sa nakaraang pahina*

at nakadakip ng dalawang opisyal. Nakasamsam dito ng 93 na mga sandata - isang anti-tank (M72-A2), 37 matataas na kalibreng riple at 55 maiikling sandata, libu-libong mga bala at iba't ibang klaseng kagamitang militar.

***"Nananatiling may
kakayahang manggulo
ang kaaway sa ating
mga sona't larangang gerilya..."***

Patuloy na napadudugo ng rebolusyunaryong kilusan ang pasistang halimaw dulot ng mga likhang sugat ng mga opensibang nabanggit. Pinahihina nito ang naghihingalong halimaw.

Nagpapatuloy ding umaani ang pag-oorganisa ng solidong base ng rebolusyon sa hanay ng mga manggagawa, maralita at petiburgesyang lunsod. Sa buong 1999, nadagdagan pa ng mahigit 100 porsyento ang bilang ng mga organisadong manggagawa na nakapaloob sa mga rebolusyunaryong kilusang lihim. Sa pamamagitan ng organisadong seksyon ng mga manggagawa, ipinaglaban at naipagtagumpay ang ilampung pakikibakang pang-ekonomiya at pang-union ng mga manggagawa.

Patuloy ding nadadagdagan ang bilang ng mga komunidad ng maralitang-lunsod at mga baryong magsasaka na nakikilusan ng rebolusyunaryong kilusan. Mabilis na nakokonsolida at napapalawak ang mga ito bilang base ng rebolusyon. Gayundin, patuloy ang masiglang pag-oorganisa sa hanay ng mga kabataan.

Nananatili ring masigla ang gawaing alyansa sa rehiyon. Gayundin, masigla ang pagtatayo ng mga rebolusyunaryong grupong suporta sa hanay ng mga mataas na gitna at mayamang magsasaka, maliliit na negosyante at iba pang mga sektor na di kabilang sa batayang saray.

Nasaksihan sa rehiyon, at maging ng buong bansa, ang marami, malalaki at matutunog na mga pagkilos ng mamamayan sa iba't ibang usaping nakaaapekto sa kanila, laluna laban sa militarisasyon, pasismo at diktadurya. Pinakamatunog sa mga ito ang pagkilos noong Setyembre laban sa mga diktaduryal na pakana ng rehimeng US-Estrada. Gayundin ang malawakang pagkilos ng mamamayan noong Disyembre 10 laban sa dumaraming mga kaso ng paglabag ng mga pasistang militar at pulis sa mga karapatang pantao bunga ng OpMak.

Nagpapatuloy ang masiglang pagpapadala ng lahat ng uri ng tulong mula sa kalunsuran patungong kanayunan. Noong 1998, mahigit sa 100 porsyento ang nadagdag sa mga kasamang sumampa sa Hukbo mula sa kalunsuran.

Hindi rin mapanatag ang kaaway maging sa itinuturing niyang likuran, sapagkat hanggang sa mga kabayanan at kalunsuran ay aktibong kumikilos at nakapagpapalakas ang rebolusyunaryong kilusan.

Paigtingin ang Pakikidigmang Gerilya

Bagamat matagumpay na nabigo ng rebolusyunaryong kilusan ang OpMak, walang puwang para magkampante. Sa istrategikong antas, nananatiling malakas ang reaksyunaryong estado kumpara sa rebolusyunaryong kilusan. Nasa istrategikong depensiba pa ang antas ng digmang bayan. Nananatiling may

***"...kailangang
seryosohin
ang kaaway sa
antas ng taktika."***

kakayahang manggulo ang kaaway sa ating mga sona't larangang gerilya sa pamamagitan ng mga mapaminsalang operasyong paghanap at paglipol. Bukod dito, may panibagong oplan na ikinasa ang kaaway — ang Oplan Balangai.

Sundan sa kasunod na pahina ▶

"Tulad ng Oplan Makabayan, ibabaon at lulunurin ng malawak at masinsing pakikidigmang gerilya ang bagong Oplan Balangai."

◀Mula sa nakaraang pahina

Napakahalaga kung gayon na higit na paigtingin ang pakikidigmang gerilya habang pinalalawak at pinalalakas ang baseng masa at isulong ang rebolusyon sa bago at mas mataas na antas. Kasabay nito, kailangang paigtingin ang mga pakikibakang masa sa loob at labas ng mga sona't larangang gerilya, at sa mga kanayunan at kalunsuran ng rehiyon.

Sa antas ng istrategiya, tiyak na muling mabibigo ng rebolusyunaryong pwersa ang bagong pakanang Oplan Balangai ng rehimeng US-Estrada. Sapagkat, tulad ng mga naunang kampanyang militar ng kaaway, bulok at naaagnas na ang pundasyong tinutuntungan nito.

Gayunman, tulad ng paulit-ulit na ipinaaalala ng panrehiyong komite ng Partido, kailangang seryosohin ang kaaway sa antas ng taktika. Nananatiling superyor ang lakas-tauhan, sandata, pagsasanay at rekurso ng kaaway kumpara sa rebolusyunaryong kilusan. Marami rin ang mapapait na depensibang karanasan noong 1999 na puminsala sa ilampung pulang kumander at mandirigma at organisadong masa.

Ipinakikita ng karanasan sa pagharap sa OpMak mula 1998 hanggang sa kasalukuyan na ang pinakamabisa pa ring sandata sa pagharap sa pasistang kaaway ay pakikidigmang gerilya. Sa pamamagitan ng pakikidigmang gerilya, patuloy na nagkakamit at nakaiipon ang Partido at hukbong bayan ng maraming tagumpay sa lahat ng larangan ng rebolusyunaryong pakikibaka.

Tulad ng Oplan Makabayan, ibabaon at lulunurin ng malawak at masinsing pakikidigmang gerilya ang bagong Oplan Balangai. At muli, mapapabilang ito sa mga oplan ng kaaway na binigo ng rebolusyonaryong pakikibaka ng malawak na masa ng sambayanan.

Sa pamamagitan ng mahigpit na pagtalima sa mga prinsipyo at taktika ng pakikidigmang gerilya, ngayong taon inaasahang mapadadalas ang mga batayan at ispesyal na taktikal na opensiba ng Bagong Hukbong Bayan ng hanggang doble kaysa sa inabot noong 1999, habang umaani ng papalawak at papalalim na baseng masa ng rebolusyon.

Napakainam ng kasalukuyang kalagayan para sa higit na pagpapaigting ng pakikidigmang gerilya. Pabor ang lahat ng mga salik sa panig ng rebolusyon. Nananatiling lubog sa krisis ng malapyudalismo ang rehimen at wala itong maaasahang anumang tulong mula sa mga imperyalistang amo na binabagabag din ng kronikong krisis ng kapitalismo. Nahihiwalay na ang naghaharing rehimen sa iba pang seksyon ng naghaharing uri at petiburgesya dahil sa mga usapin ng kawalan ng kakayanang mental na pamunuan ang bansa, kroniismo at nepotismo, militaristang asta, diktaduryal na tendensya, pakanang chacha/concord, at iba pa.

Gayundin, tuluyan na itong nahiwalay sa masa dahil sa pagkahubad ng maskara nito ng kunwa'y makamahirap. Tulad ng idolong si Marcos, nalantad na ang tunay na kulay nitong diktador, militarista, makadayuhan, at naglilingkod lamang sa interes ng mga kaibigan at kamag-anak.

Napipinto nang sumiklab ang malawak na pakikidigma ng Moro Islamic Liberation Front (MILF) sa Mindanao laban sa rehimeng Estrada dahil sa paulit-ulit na pananabotahe ng rehimen sa usapang pangkapayapaan at pagsalakay sa kanilang mga pwersa.

Ang MILF ay rebolusyunaryong organisasyon ng mamamayang Moro na kaalyado ng Partido laban sa reaksyunaryong estado. Ang pagsiklab ng digmaan sa Mindanao ay tiyak na babanat sa pwersang militar at kakaunting rekurso ng rehimen.

Lahat ng mga salik na ito ay nagbibigay ng pambihirang pagkakataon na dapat sagpangin ng rebolusyunaryong kilusan upang higit na mapaigting ang pakikidigmang gerilya tungo sa bago at mas mataas na antas ng digmang bayan. **K**

Bigo Ang OpMak!



Nang idinirehe ang militaristang kampanyang Oplan Makabayan, naghambog ang artistang si Joseph Estrada na “pipisain” ang rebolusyunaryong kilusan ng mamamayan. Upang tiyaking makapapanalasa ang kanyang pakana, bata-batyang mersenaryong tropa ng AFP at PNP ang kanyang ikinalat sa buong bansa.

Sa utos ng direktor, walang patumanggang inihasik ng mga pasista ang matitinding pandarahas sa masa at pananalakay sa mga yunit ng Bagong Hukbong Bayan. Sa gitna ng desperasyon, itinambak ni Estrada sa buong rehiyon ang 12 batalyon ng AFP, dalawang ispesyal na batalyon ng PNP (bukod pa ang dati ng nakapakat na PMG). Nireaktiba ang CAGFU at ikinalat ang makinarya sa paniktik sa mga larangang gerilya.

Bagamat ininda ng BHB at masa ang mga pananalakay ng pasistang tropa ng rehimeng US-Estrada, hindi ito naging sagka sa masiglang pagsusulong ng rebolusyon.

Ang Opmak o Oplan Makabayan ay isang komprehensibong plano ng rehimeng US-Estrada upang diumano’y pangalagaan ang seguridad ng bansa at panatilihin ang umiiral na “kaayusan”. Sa katunayan, ito’y isang desperadong pakana ng rehimen upang sagkaan ang tumitinding pakikibaka ng sambayanang Pilipino.

Ang Layunin ng Opmak

Inilunsad ang Opmak sa gitna ng lumalalang pang-ekonomya at pampulitikang krisis ng malakolonyal at malapyudal na naghaharing sistema. Sa ilalim ng rehimeng US-Estrada, sumahol ang panlipunang ligalig bunga ng lumalaking diskontento ng mamamayan: lumalakas na daluyong ng paglaban ng rebolusyunaryong kilusan. Walang duda, ang Opmak ay reaksiyon ng papet na rehimen sa inaaning maniningning na tagumpay ng kilusan sa pagsusulong ng bagong demokratikong rebolusyon ng bayan.

Partikular na layunin nito ang pagtukoy at pagputol sa linya ng komunikasyon at rekurso ng

Sundan sa kasunod na pahina ►

◀Mula sa nakaraang pahina

rebolusyunaryong kilusan at pagmamanman at sa kalauna'y pagkakahon sa kilos ng mga namumunong kadre sa rehiyon. Ikinalat sa kanayunan ang mga lambat ng paniktik at nangalap ng mga lokal na importer na siyang maniniktik sa galaw ng mga yunit gerilya sa kanilang lugar.

Nireaktiba ang CAFGU. Pandagdag rin ito sa lakas-tauhan ng AFP, na bagama't di-hamak na nakalalamang sa bilang kumpara sa BHB ay kapos pa rin ang kakayahan upang mapagpasyang gapiin ang huli. Sila ang pangunahing katulong ng AFP sa pandarahas at pananakot sa mamamayan sa kanayunan.

Maging ang mga progresibo at ligal na organisasyon sa kalunsuran ay nakararanas ng ibayong pandarahas sa kamay ng mga pasistang militar.

Ginamit na katulong sa implementasyon nito ang iba't ibang ahensya ng pamahalaang reaksyunaryo. Gaganap ng kani-kaniyang papel ang bawat ahensya para papaniwalain ang mamamayan sa kasinungalingang "para sa mahirap" ang lahat ng pagsisikap ng naghaharing rehimen. Lahat, para ilayo ang mamamayan sa tamang landas ng pagrerebolusyon.

Sa buong panahon ng paglulunsad ng Opmak, buong kahayupang nilabag ng pasistang militar ang karapatang pantao ng mamamayan. Laganap ang masaker, salbeyds, iligal na pag-aaresto, tortyur at pagpapalayas sa mga magsasaka sa lupang kanilang sinasaka.

Inasahan ng rehimen ng US-Estrada na bago sumapit ang 2000 ay makakamit ng Opmak ang mga itinakdang layunin nito. Nasagad na ang itinakdang panahon subalit nananatiling matatag ang kilusan sa pagsusulong ng armadong pakikibaka.

Bigo ang Plano

Sa isang artistang hindi mapag-iba ang realidad at pelikula, inakala ni Estrada na nakapaloob sa isang iskrip ang kanyang ginagawa - kung anong naisin niya ay siyang mangyayari. Subalit kabaligtaran ng kanyang

inaasahan, trahedya hindi tagumpay ang kinasapitan ng kanyang pelikulang Opmak. Mapagpasyang binigo ng rebolusyunaryong mamamayan ang tangka ni Estrada na supilin ang kanilang paglaban.

Sa paglaban sa Opmak, makabuluhan ang naging ambag ng Timog Katagalugan sa paglalantad, pagkondena at pagbigong kampanya. Ito ay sa kabila ng ginawang pagtatakda ng kaaway sa rehiyon bilang prayoridad na paglunsaran ng Opmak. Sa wastong pagtangan sa mga prinsipyo, tinapatan ng rebolusyunaryong kilusan ng TK ang Opmak ng ibayo pang pagpapaigting ng pakikidigmang gerilya at pakikibakang masa. Ang lahatang panig na pagsulong ng rebolusyon sa rehiyon ay malinaw na manipestasyon na nabigo ang papet na rehimen sa kanyang desperadong pakana.

"Hanggang sa kasalukuyan, wala ni isa mang sona o larangang gerilya ang nadurog ng Opmak ni Estrada."

Susi sa tagumpay ang pagtahak sa wastong estratehikong linya ng pagkubkob sa kalunsuran mula sa kanayunan sa pamamagitan ng matagalang digmang bayan. Sa gabay ng kilusang pagwawasto, buong giting na isinulong ng hukbong bayan ang malaganap at masinsing pakikidigmang gerilya na umaani ng papalakas at papalawak na baseng masa.

Hanggang sa kasalukuyan, wala ni isa mang sona o larangang gerilya ang nadurog ng Opmak ni Estrada. Nasasaid na ang rekursong nakalaan para sa kampanya, sagad na ang panahong itinakda para rito, patuloy na nangangarap si Estrada na magagawa niyang pisain ang rebolusyunaryong kilusan.

Patuloy Ang Pagsulong Ng Rebolusyon

Sa TK unang inilunsad ang Opmak bago pa man pormal na pirmahan ito ni Estrada noong Setyembre 1998. Nagpatuloy ang sustenidong pagsulong ng rebolusyunaryong gawain kahit na dumanas ang kilusan ng pansamantalang kahirapan. Ilang kumander at mandirigma rin ng BHB ang nagbuwis ng buhay alang alang sa pagsulong na ito. Sa kanilang alaala, iniuukol

Sundan sa kasunod na pahina ▶

◀Mula sa nakaraang pahina

natin ang pinakamataas na pagpapahalaga at pagpupugay sa tuwinang mababanggit ang ating mga tagumpay.

Sa kabila ng mga kahirapan, nakapaglunsad ang hukbo ng mga matutunog na taktikal na opensiba na sumugat sa katawan ng kaaway at humambalos sa kanyang tulirong ulo. Sa nakaraang taon, nailunsad ng hukbo ang may kabuuang 79 na taktikal na opensiba (13 malalaking taktikal na opensiba, 4 na ambus, 15 reyds at mga operasyong isparo).

Pinakatampok sa mga ito ang magkasunod:

- reyds sa istasyon ng PNP sa Pola, Oriental Mindoro noong Nobyembre 1, 1999, kung saan nakasamsam ng kauna-unahang anti-tank (M72-A2) ang BHB, bukod pa sa ibang baril at bala;
- reyds sa istasyon ng PNP sa Dolores, Quezon noong Nobyembre 3 na nakasamsam sa signipikanteng bilang ng sandata at nakadakup kay PCI Martin; at
- pagdakip ng BHB sa hepe ng paniktik ng AFP Southern Luzon Command na si Major Noel Buan sa isang ispesyal na operasyon.

Sa kasalukuyan ay nanatili sina P/CI Martin at Major Buan sa pangangalaga ng Melito Glor Command. Bilang mga bihag ng digma, tinatamo ng dalawang opisyal ang kahat ng kanilang karapatan ayon sa itinakda ng internasyunal na makataong batas.

“...istratehikong nabigo na ang Opmak.”

Matataginting rin ang mga nailunsad na opensiba ng BHB pagpasok ng bagong taon. Nagsilbing saludong putok rito ang matagumpay na pagpaparusa sa pusakal na PA Major, *intelligence officer* at Mayor ng San Teodoro, Oriental Mindoro na si Oscar Aldaba.

Sumunod dito ang ambus sa mga elemento ng 9th SRC sa Brgy. Amuyong II, Mabitac, Laguna noong Pebrero 15, 2000.

Sa buong taon, nakasamsam ang hukbong bayan ng may 37 malalakas na sandata at 55 pistola, nakapaslang ng 56 kaaway at nakasugat ng lima.

Masiglang kumikilos ang masang magsasaka sa paglulunsad ng rebolusyong agraryo sa kanayunan. Tumataas ang bilang ng pamilyang nakikinabang sa inaaning tagumpay para sa pagpapababa ng upa sa lupa, pagpapataas ng sahod, okupasyon ng lupa at paglaban sa pangangakamkam ng lupa ng mga despotikong panginoong maylupa at ispekulador sa lupa. Sa gitna ng pandarahas ng pasistang militar, walang takot na naglunsad ang mga organisasyong masa ng kampanyang laban sa militarisasyon sa kanayunan.

Ganap namang nailantad ng mga aktibistang masa sa kalunsuran ang pasistang pakana ni Estrada. Napukaw ang maraming bilang ng mamamayan sa mga inilunsad na malawakang propaganda at edukasyon at napakilos sila sa mga isinagawang malalaking militanteng pagkilos upang kondenahin ang Opmak na siyang ginagawang pangunahing kasangkapan ni Estrada upang ipataw ang pasistang paghahari sa bansa.

Ngipin sa ngipin nilang nilabanan ang mga propagandang ikinakalat ng kaaway upang siraan sa mamamayan ang rebolusyunaryong kilusan. Dumadagsa ang mga tao sa lansangan sa mga inilulunsad na kampanyang anti-pasista at anti-militarisasyon. Noong Setyembre 21, ang paggunita sa deklarasyon ng batas militar, tinatayang may anim na libong katao ang dumalo sa magkakahiwalay na mobilisasyon sa mga lunsod at sentrong bayan ng rehiyon. Noong Disyembre 10, araw ng paggunita sa Pandaigdigang Deklarasyon para sa Karapatang Pantao, may apat na libong katao ang lumahok sa mga mobilisasyon sa lahat ng probinsya sa rehiyon upang kondenahin ang mga isinagawang paglabag sa karapatang pantao ng rehimeng US-Estrada sa ilalim ng Opmak.

Masasabing istrategikong nabigo na ang Opmak. Maging si Estrada ay umamin na nabigong durugin ng Opmak ang rebolusyunaryong pakikibaka ng mamamayan. Kinailangan na nilang umimbento ng bagong pamagat sa lumang pakana: ang Oplan Balangai. Ang ganap na pagkalantad ng Opmak ang nagtulak kay Estrada na palitan ito ng bago. Inaasahan ng mamamayan at rebolusyunaryong kilusan na paiigtingin ng pasistang militar ang pandarahas at pananalakay nito. Nakahanda at nakatitiyak na sila, tulad ng nangyari sa Opmak, mabibigo nila ang anumang pagtatangka ng rehimeng US-Estrada na supilin ang kanilang rebolusyunaryong pakikibaka hanggang sa makamit ang ganap na tagumpay. **K**

Sa ika-31 taon ng BHB:

Pagsulong sa Gitna ng Matitinding Operasyong Militar



Mula sa 60 lakas tauhan noong Marso 29, 1969, na nasasandatahan ng siyam na riple at 26 na inperyor na armas, mayroon na ngayong 20 batalyon ang Bagong Hukbong Bayan (BHB) na nasasandatahan ng mga riple at nadaragdagan ng mga yunit milisya at depensa sa sarili na may libong armas. Mula sa isang distrito ng Tarlac, mayroon na ngayong mahigit 80 larangang gerilyang nakalatag sa mahigit 60 probinsiya ng bansa. Patunay na malayo na ang naabot ng ating hukbo.

Ayon kay Tagapangulong Armando Liwanag, sa kanyang mensahe sa ika-31 anibersaryo ng ating hukbo, ang BHB ay lumago hanggang maging pinakamakapangyarihang rebolusyunaryong pwersa sa kasaysayan ng sambayanang Pilipino. Nahigitan nito ang lahat ng naunang mga rebolusyonaryong hukbo sa usapin ng pagiging pambansa ang saklaw at pagiging malalim na nakaugat sa masa.

Dagdag pa rito'y mapagpasya nang naiwaksi sa hanay ng ating hukbo ang mapaminsalang "kaliwa" at kanang oportunidad na mayagpag sa kilusan at naghiwalay sa atin sa tamang landas ng pagrerebolusyon. Sa gabay ng Ikalawang Dakilang Kilusang Pagwawasto ay muli nang isinusulong ng BHB ang wastong linya ng demokratikong rebolusyong bayan sa pamamagitan ng matagalang digmang bayan.

Ang Pagpupundar ng BHB sa Rehiyon

Mula nang maitatag ang BHB noong March 1969, agad na pinagsikapang maitayo ang mga sonang gerilya dito sa Rehiyong Timog Katagalugan (TK). Batay sa naisagawang pagsisiyasat, inilunsad mula noong Setyembre, 1972 hanggang unang hati ng 1973 ang unang apat na Sandatahang Yunit Pangpropaganda (SYP). Inilunsad ang mga ito sa Tuy-Nasugbu, Batangas, Sampaloc-Mauban, Quezon, hangganang Quezon-Laguna at hangganang Quezon-Bikol (QB). Sa mga ito, ang mga SYP lamang sa hangganang Quezon-Laguna at sa QB ang nakapagpanatili.

Sa kabila ng puspusang pagsisikap, hindi kagyat na nakabuwelo ang pagpapalawak ng BHB sa rehiyon. Noong 1977 ay may kabuuang limang SYP pa lang ang

Sundan sa kasunod na pahina ►

◀Mula sa nakaraang pahina

nabuo. Dalawa sa Laguna at tatlo sa QB Zone (QBZ). Ang mga ito ay mayroon lamang iilang riple. Ang karamihan sa mga organisador ay mga pangkat kadreng karaniwa’y walang baril. Ito’y sa kadahilanang iilan at mahihina pa ang mga armas na natipon ng ating hukbo noong panahong iyon.

Subalit naging masigla ang rebolusyunaryong gawain ng BHB sa QB mula noong 1979. Mabilis itong nakapagpalawak sa nasabing lugar at mula doo’y papaalon itong sumulong patungong South Quezon (SQ), Bondoc Peninsula (BP) at Lower Sierra Madre (LSM).

Noong 1980, muling nagtalaga sa Oriental Mindoro ng mga pangkat sa pagpapalawak para balikan ang mga sonang gerilyang naiwan ng nalipol na SYP noong 1978. Nagtalaga rin sa Occidental Mindoro noong 1982.

Ito ang naging simula ng maraming liko’t ikot na pakikibaka ng BHB sa rehiyon hanggang sa maabot na ng pagkilos nito sa kasalukuyan ang lahat ng 10 probinsya sa TK.

Matinding Panunupil

Kasabay ng mga pagsusumikap na sumulong at makapagpalakas ng sarili, hinarap ng ating hukbo ang patindi-nang-patinding panunupil ng kaaway. Ipinatupad ng kaaway ang iba’t ibang pamamaraan ng pagsagka sa pagsulong ng rebolusyon. Pagkontrol sa populasyon, *food blockade*, pagtatayo ng pamoso-sa-kawalanghiyaang CHDF, pagtatayo ng mga ditatsment sa mga estratehikong bahagi ng mga sonang gerilya at paghahasik ng matinding takot sa baseng masa.

Ngunit sa kabila ng mga ito’y naitatag ng hukbo ang taglay nitong lakas sa pamamagitan ng pagsalig sa masa. Nasubok na ito sa di mabilang na labanan at nakapangibabaw ang hukbo dito sa TK sa mga kampanya ng pagkitil-sa-usbong mula pa nang itayo ang unang mga SYP sa rehiyon. Nabigo rin nito ang 14-na-taong pasistang diktadura at ang mga inilunsad nitong kampanya ng panunupil sa rehiyon, ang Oplan Cadena

de Amor (OCdA) at ang Oplan Katatagan na pambansa ang saklaw.

Ang Palalong OCdA

Nagsimulang magdagsaan noong Enero 1982 ang bata-batalyong tropa ng Armed Forces of the Philippines (AFP) sa rehiyon. Ipinakat sa South Quezon, Bondoc Peninsula at Lower Sierra Madre ang 16th, 49th, 42nd at 31st Infantry Battalion (IB) ng Philippine Army (PA). Sa bahaging QBZ ay ipinakat naman ang 45th, 11th, ilang bahagi ng 31st IB ng PA, 60th Philippine Constabulary Battalion at 8th Marine Battalion Landing Team

(MBLT). May *helicopter support* ang bawat batalyon at nagtalaga ng dalawang boke-de-gyera—isa sa Ragay Gulf at isa sa Calauag Bay.

Noong una ay inakala ng mga kasama na isa lamang malaking operasyong militar ang inilulunsad sa rehiyon. Subalit noong Hulyo 1982 ay naambus ng mga kasama ang isang komboy. Isa sa mga napaslang dito si Col. Resma ng General Inspector’s Office. Napasakamay ng ating hukbo ang dala niyang mga ulat at dito lamang natin nabatid na ang *code name* ng malawakang operasyong militar ay Oplan Cadena de Amor at isang

prototype na oplan para sa ilulunsad na mas malaki at malawakang operasyong militar sa buong bansa: ang Oplan Katatagan. Layunin ng OCdA na sagkaan ang pag-abante ng CPP-NPA patungong *mainland* ng TK mula sa QBZ.

Taktikang pagkubkob at paglipol ang ginamit ng mga kaaway na paraan ng operasyon. Dinudumog sa pamamagitan ng laking-brigadang operasyon ang mga lugar na may natunagan silang kilos ng Pulang hukbo.

Sa bawat operasyong isinasagawa ng mga militar ay sinisigurado nilang may nadadamay na mga sibilyan. Malawakan ang paglabag sa karapatang pantao katulad ng mga panggagahasa, pagpatay, pambubugbog, pagnanakaw, at panununog ng bahay.

Hinarap ng BHB ng buong giting ang OCdA. Inilagay sa *combat footing* ang lahat ng mga yunit ng

*“Inilagay sa
combat footing ang
lahat ng
mga yunit ng BHB
at inilunsad ang
isang kampanyang
pulitiko-militar.”*

Sundan sa kasunod na pahina ▶

◀Mula sa nakaraang pahina

BHB at inilunsad ang isang kampanyang pulitiko-militar. Naging malawak at masinsin ang paglulunsad ng mga taktikal na opensiba. Sa kabila ng katotohanang mayroon lamang mahigit isang kumpanyang lakas tauhan ang ating hukbo noong panahong iyon, nagawang bigwasan ng mga yunit ng BHB ang lahat ng siyam na batalyong inilaglak dito ng AFP maliban sa 8th MBLT na nakapakat sa labas ng AOR ng ating hukbo. Mula Abril - Agosto, 1982 ay nakalipol ng 96 na tropa ng kaaway at nakapagpalitaw ng 75 na matataas na kali-

***“Nagawang ipagtagumpay
ng ating hukbo ang OCdA
sa pamamagitan ng mahigpit
na pagkukombina sa
tatlong sangkap ng
armadong pakikibaka...”***

breng armas (HPR). Higit sa lahat, sa halip na masagkaan ay mapangahas na nakapagpalawak ang ating hukbo patungong BP at LSM.

Katuwang ng mga tagumpay na ito ang paglulunsad ng mga hayag na pagkilos na may katangiang anti-militarisasyon. Sa panahong ding ito isinagawa ang matagumpay na kampanyang *anti-coco levy* na nagpasigla sa hayag na pakikibakang masa sa buong rehiyon.

Nagawang ipagtagumpay ng ating hukbo ang OCdA sa pamamagitan ng mahigpit na pagkukombina sa tatlong sangkap ng armadong pakikibaka: ang pagbubuo at pagpapalakas ng hukbo sa pamamagitan ng paglulunsad ng malaganap at masinsing pakikidigmang gerilya, at upang makuha ang suporta ng mamamayan, isanasabay rito ang pagsusulong ng rebolusyong agraryo at pagtatayo ng baseng masa.

Nagtuluy-tuloy ang paglulunsad ng OCdA hanggang 1983 at nagtuluy-tuloy rin ang paglulunsad ng kampanyang pulitiko-militar hanggang sa unti-unting alisin

ng mga kaaway ang ilang mga batalyon at itinira na lamang ang 42nd, 49th, 16th, 45th, 11th IBs ng PA at 60th PC Bn para sa pagpapatupad ng Oplan Katatagan.

Panahon ng Dramatikong Pagsulong

Ang panahon ng 1984-85 ay panahon ng mabilis na pagsulong sa gitna ng matinding krisis sa ekonomya at pulitika at sa gitna ng Oplan Katatagan.

Itinayo noong panahong ito ang kauna-unahang kumpanyang gerilya sa rehiyon, at nagtayo rin ng dalawang iskward gerilya bukod pa sa dati nang nakatayong iskward gerilya para makatuwang ng kumpanya sa paglulunsad ng mga kakayaning opensiba. Resulta nito’y higit na dumalas, lumaki at tumindi ang paglulunsad ng mga opensiba. Nahigitan pa ang napalitaw na sandata sa taon ng 1985 kumpara sa napalitaw na mga sandata sa panahon ng 1978-84.

Kasabay nito’y inilunsad ang kampanya sa pagpapababa ng upa sa lupa at pagpapataas ng sahod ng mga manggagawang bukid. Ipinanawagan ang mapangahas na pagpapalawak sa baseng masa sa kanayunan at tinakdaan ang bawat YGM na makapagbuo ng sampung Grupong Pang-organisa (GP) kada buwan. May panawagan ring ikonsolida ang mga ito at iangat ang mga GP patungong Komiteng Pang-organisa (KP).

Masiglang tumugon ang mga yunit ng hukbo dito. Sa katunaya’y may isang katangi-tanging yunit na umabot sa 60 - 90 na GP ang nabuo sa loob ng isang buwan.

Sa Oriental Mindoro, narekober ang mga naiwang lugar noong 1982 nang maitaboy ng malaking operasyong militar ang SYP patungong timog ng probinsya at mabilis ding nakapagpalawak. Samantala, nasaklaw na ng pagkilos ng hukbo ang halos lahat ng bayan sa Occidental Mindoro. Naipundar na rito ang may kalakihang baseng masa na may relatibong lalim noong 1985.

Pagsagipsip ng Disoryentasyon

Subalit ang mga pagsulong na ito ay nadiskaril ng pagsagipsip ng malalang disoryentasyon sa anyo ng insureksyunistang programang “fast track / slow track” (FT/ST). Itinakda ang maling linya ng pagsulong na wala sa-panahong regularisasyon na sa esensiya ay bertikalisasyon ng mga pormasyong gerilya,

Sundan sa kasunod na pahina ▶

◀Mula sa nakaraang pahina

pagpapaigting ng mga opensibang militar na hindi tumatantiya sa epekto sa pulitika, paglulunsad ng pakikidigmang partisano sa kalunsuran at mga pangkalburong aksyong masa para sa inaasam na insureksyon.

Sa panahon ng 1986-87 ay ibinagsak ng AFP ang walo nitong batalyong panagupa bukod pa ang mga pwersa ng dating PC-INP dito sa ating rehiyon. Sa Mindoro ay inilunsad ang Oplan Saliksik I at II na may layuning wasakin ang matatag na bahagi ng lager na nasa timog ng Oriental at gitna ng Occidental.

Dahil sa adbenturismong militar, kapinsalaan na lampas sa inakala ang naging resulta. Kumitid ang saklaw ng mga lager at matalas na bumagsak ang bilang ng mga organisadong masa.

Ang Oplan Lambat Bitag (OLB)

Pagbagsak ni Marcos ay pumalit sa pwesto ang rehimeng US-Aquino at ideneklara nito ang patakarang Total War. Ipinatupad nito ang OLB at ibinuhos ang halos sampung porsyento ng badyet ng reaksyunaryong gobyerno taun-taon mula 1987 para sa militar. Patuloy na pinalaki at dinagdagan ang mahigit 200,000 lakas-taunan ng AFP noong 1987.

Dito sa Timog Katagalugan mula 1987 hanggang 1992, ipinakat ang 202 at 203rd Brigade at ang 4th GHQ. Mahigit sa sampung batalyong pwersang regular at paramilitar ang kabuuang tropang militar na nakatalaga sa rehiyon.

Ipinagpatuloy ni Ramos ang patakarang Total War nang palitan nito sa pwesto ang rehimen ni Aquino. Ang naging pangunahing linya ng rehimen ay lipulin ang rebolusyunaryong pwersa sa pamamagitan ng panlilinlang at sa pamamagitan ng kalupitan ng pakanang *low-intensity conflict*, estratehiyang *gradual constriction* at OLB. Inilunsad nito ang isang digmang madaling tinatapos.

Itinalaga nito ang mas malalaking pwersang panagupa sa mga larangang gerilyang *stronghold* ng BHB habang nananatili ang ilang pwersang regular sa mga ikinategorya nitong *foothold*. Tininyak din ng rehimen na

“Malaking dahilan ng pagkabigo ng OLB ang inilunsad na Ikalawang Dakilang Kilusang Pagwawasto...”

ang lahat ng epektibong pwersang pangkombat ay nagagamit sa opensibang militar sa mga larangan sa buong kapuluan. Pinagsanib ang lakas ng AFP at PNP sa ilalim ng magkasabay na Oplan Sandugo at OLB.

Nabigo ang OLB I-II-III, na may layuning wasakin ang rebolusyunaryong kilusan. Dahil dito pinalawig muli ng rehimeng US-Ramos ang OLB IV. Pinanatili ang mga nakapakat na mga malalaking pwersang panagupa ng AFP sa mga larangang gerilya sa buong kapuluan. Paulit-ulit ang paglulunsad ng malawakang opensibang militar, operasyong sikolohikal at sibil-militar. Kaakibat nito, naglaan ang rehimen ni Ramos ng walang-kapantay na pagtaas ng badyet militar upang matugunan ang

mga engrandeng ambisyon.

Mula 1986, mahigit dalawang milyong mamamayan ang naging *refugee* bunga ng pambobomba mula sa hukbong pang-himpapawid at hukbong katihan, kasabay ng pambubuldoser sa mga bahay ng masa. Ang mga pwersang militar, pulis at paramilitar ay walang pakundangang nagmamasaker, namamaslang, ilegal na nang-aaresto, nangkukulong, nanununog at nangungulimbat ng mahahalagang ari-arian ng mamamayan.

Ang *gradual constriction* at Lambat Bitag ay naglaman pangunahin ng mga operasyong pagkakait ng base (base denial) at kampanyang pagkubkob at paglipol. Ang layunin nito ay “wasakin ang baseng masa at kasunod ang pagdurog nito sa malalaking pormasyon ng hukbo”. Bahagi ng operasyon ang pagtatayo ng mga *special operation teams* (SOT). Kasabay nito ang pagkokonsentra ng pwersang laking-dibisyon at laking-brigada sa mga pinakamalakas na mga larangang gerilya ng hukbong bayan at pagbubuo ng bata-batalyong mga CAFGU at mga anti-komunistang sektang panatiko.

Ang OLB ay isang planong pang-operasyon na umangkop sa linyang militarista, pormasyon at lihis na pagkilos ng hukbong bayan. Umayon ito sa disenyo ng plano at kasanayan ng tropang militar ng AFP, na kung hindi naiwasto ng BHB ang patuloy na pagkokonsentra ng mga di masustining malalaking pormasyon at

Sundan sa kasunod na pahina ▶

◀Mula sa nakaraang pahina

pagbabawas sa bilang ng mga lokal na pwersang gerilya nakalaan sa pagpapalawak at pagkokonsolida ng baseng masa, patuloy na liliit ang base at madudurog ang hukbong bayan. Mistulang pumasok sa mismong bitag ng kaaway ang ating hukbo sa mga panahong ito.

Subalit sa kabila ng pananagipsip ng dulong-kaliwang oportunista at ng Kanang oportunistang mga agos ng repormismo, kapitulasyunismo at likidasyunismo, patuloy na nabigo ang mayor na mga kampanya ng kaaway para wasakin ang BHB at baseng masa. Nakapanatili at patuloy na nakapagpanibagong lakas ang rebolusyonyong pwersa sa kabila ng patakarang Total War.

Malaking dahilan ng pagkabigo ng OLB ang inilunsad na Ikalawang Dakilang Kilusang Pagwawasto (IDKP) sa buong Partido at Hukbong Bayan. Ito'y dahil sa muling pagpapailalim ng Hukbo sa tamang oryentasyon at wastong pagsasanay sa pulitiko-militar.

Reoryentasyon at Panibagong Pagsulong

Inilunsad ng kilusan ang Ikalawang Dakilang Kilusang Pagwawasto noong 1992. Resulta ng kilusang pagwawasto, may mas matalas at malalim na komprehensibong pag-unawa ang mga kasapi ng Partido at Pulang kumander at mandirigma sa pangangailangang paunlarin ayon sa mga estratehikong yugto ng matagalang digmang bayan, at sa kasalukuyang yugto ng estratehikong dependensya, magsagawa ng malawak at masinsing pakikidigmang gerilya na patuloy na umaani ng papalawak at papalalim na baseng masa. Itinakwil ang insureksyunismong lunsod gayundin ang wala sa panahong pagbubuo ng mga malalaking yunit ng hukbo na nahihiwalay sa masa at di masustini.

Dito sa TK, sa tulong ng IDKP ay napangibabawan ng mga yunit ng Melito Glor Command (MGC) ang mga "kaliwang" oportunistang linya at ang pagpaling sa konserbatismong militar bunga

ng pagkakapaso sa mga "kaliwang" oportunistang pagkakamali. Mapagpasyang naiwaksi nito ang mga ideyang idinulot ng FT/ST at ng maling linya ng Estratehikong Kontra Opensiba.

Sa pamamagitan ng IDKP ay muling tiniyak na nasa absolutong pamumuno ng Partido ang BHB dito sa ating rehiyon. Ito ay pinatutunayan ng mahigpit na pamumuno ng Komiteng Rehiyon ng Timog Katagalugan sa MGC.

Ipinatutupad ng lahat ng yunit ng hukbo sa rehiyon ang disiplinang bakal. Ang lahat ng mga Pulang kumander at mandirigma ng MGC ay matamang tumutupad sa tres-otso, mahigpit na tumatalima sa prinsipyo ng simpleng pamumuhay at puspusang pakikibaka.

Muli'y malalim nang nakaugat ang mga yunit ng MGC sa masa. Hindi magagampanan ng ating hukbo sa rehiyon ang tungkulin nitong durugin ang burges na estado at itatag ang pulang kapangyarihan ng Demokratikong Gobyernong Bayan sa rehiyon kung hindi ito mahigpit na sumasalig sa lakas ng masa. Kaya't matapat nitong tinutupad ang tungkuling pukawin, organisahin at pakilusin ang masa sa pamamagitan ng puspusang gawaing masa.

Inilulunsad nito ang rebolusyonyong edukasyon sa hanay ng masa. Nagbubuo ito ng iba't ibang tipo ng organisasyong masa sa hanay ng mga magsasaka, mangingisda, kabataan, kababaihan, manggagawang pangkultura at mga panggitnang-uri. Ginagampanan din nito ang tungkulin ng pagpapakilos sa masa para sa rebolusyong agraryo at sa pagsuporta sa armadong pakikibaka.

Mahigpit na tinutupad ng MGC ang pambansang patakarang 70-30 sa pagbalanse sa mga horisontal at bertikal na pormasyon ng hukbo. Ibig sabihin, hindi hihigit sa 30 porsiyento ng kabuuang lakas tauhan ng hukbo ay dapat tipunin sa mga panlabang yunit at di

***"Dahil sa
balansiyadong pakat
ng mga tauhan at
maayos na
reoryentasyon ng
ating hukbo, nasa
posisyon itong
maglunsad ng
paparaming taktikal
na opensiba..."***

Sundan sa kasunod na pahina ▶

◀Mula sa nakaraang pahina

bababa sa 70 porsiyento ay dapat nakakalat sa mga yunit sa gawaing masa.

Dahil sa balansyadong pakat ng mga tauhan at maayos na reoryentasyon ng ating hukbo, nasa posisyon itong maglunsad ng paparaming taktikal na opensiba habang hindi napababayaan ang paggagawaing masa. Sa katunayan, nakabatay ang mga TO na inilulunsad nito sa patuloy na lumalawak at lumalalim na suporta ng mamamayan. Ang mga pagsasaayos ring nabanggit sa itaas na itinakda ng IDKP ang nagtiyak ng muling pagsulong ng rebolusyonaryong gawain ng ating hukbo sa rehiyon.

Pagsulong sa Gitna ng OPMak

Ang mga inabot nang tagumpay na ito ang nagsisilbing salalayan ng siguradong pagsulong ng

***"Ang pagkabigo ng OpMak
ay pinatutunayan ng
paparami at papatinding
mga taktikal na opensiba
ng mga yunit ng Melito Glor
Command."***

rebolusyon sa gitna ng pinakabagong kampanya ng panunupil na isinasagawa ngayon ng Rehimeng US-Estrada, ang Oplan Makabayan (OpMak). Ang TK ang isa sa mga prayoridad na rehiyong pinag-lulunsaran nito. Naglalayon ang operasyong ito na sagkaan ang pagsulong ng rebolusyonaryong kilusan sa rehiyon.

Ang pagkabigo ng OpMak ay pinatutunayan ng paparami at papatinding mga TO ng mga yunit ng MGC. Noong nakaraang taon, nakapaglunsad ang hukbo sa ating rehiyon ng 79 iba't ibang tipo ng mga taktikal na opensiba. Nakumpiska sa mga operasyong ito ang 37 matataas na kalibreng riple, 55 maiiksing armas at isang anti-tank.

Nahigitan pa nito ang mga nailunsad natin noong 1997 na umabot lamang ng 60 TOs at lalo't higit noong 1998 na umabot lamang sa 38.

Tumampok sa mga nailunsad na mga saligang TO ang reyde sa istasyon ng PNP sa Pola, Oriental Mindoro noong Nobyembre 1 at ang reyde sa istasyon ng PNP sa Dolores, Quezon noong Nobyembre 3 kung saan nadakip si P/CI Abelardo Martin. Malaki rin ang naging ganansyang pampulitika natin sa pagkakaparusa kay Maximo Limeta, ang pusakal na kapitan del baryo ng Hacienda Looc. Ganoondin ang ginawa nating pamamarusa kay Col. Labitigan sa Sariaya, Quezon at ang inilunsad na *special operation* para madakip ang AC2 Chief (chief intelligence officer) ng SOLCOM na si Major Noel Buan.

Matataginting ang mga nailunsad na TOs ngayong 2000. Ang nagsilbing pambungad nito ay ang matagumpay na pamamarusa sa pusakal na retiradong PA Major, *intelligence officer* at Mayor ng bayan ng San Teodoro, Oriental Mindoro na si Oscar Aldaba. Sumunod dito ang ambus sa mga elemento ng 9th SRC sa Brgy. Amuyong II, Mabitac, Laguna noong Pebrero 15.

Dagdag pa sa mga tagumpay na ito ang ambag ng mga yunit ng MGC sa pagmumulat, pag-oorganisa at pagpapakilos para sa pagsusulong ng rebolusyonaryong kilusang masa (RKM) sa kanayunan. Ang RKM sa kanayunan ay sumulong sa harap ng matitinding operasyon ng panunupil ng AFP sa balangkas ng OpMak. Sa katunaya'y nadagdagan ang bilang ng organisadong masa sa kanayunan ng 32 porsiyento noong nakaraang taon.

Sa nakaraang ding taon, may naitalang 42 iba't ibang tipo ng pagkilos para sa rebolusyong agraryo sa anim na lalawigan. Doble ang bilang na ito kumpara sa 1998. Nabiyayaan nito ang 1,269 indibidwal at 960 pamilya ng mga magsasaka.

Sa mga tagumpay na ito'y tiyak na ang kabiguan ng OpMak. Katulad rin ng sinapit ng Cadena de Amor, Katatagan at Lambat Bitag. Habang matamang ikinukombina ng hukbo ang tatlong sangkap ng armadong pakikibaka: pagbubuo at pagpapalakas ng hukbong bayan, pagsusulong ng rebolusyong agraryo at puspusang pagsisikap na magtayo ng base ay tiyak ang tagumpay. **K**

PATULOY ANG MGA MATITINDING PAGLABAG SA KARAPATANG PANTAO NG REHIMENG US- ESTRADA

Takot at pagkondena. Ito ang magkahalong damdaming bumabalot sa mga mamamayan ng rehiyong Timog Katagalugan.

Paanong hindi takot ang madarama ng mamamayan gayong patuloy ang pandarahas at panliligalig ng mga puwersa ng pulis at militar sa rehiyon? Paanong hindi ikokondena ang isang estadong dapat sanang nagtataguyod sa karapatan ng mamamayan ngunit ito pa ang nananampalasan?

Ang mga pandarahas ay bunga ng malawakang operasyong militar na inilulunsad ng magkahalong puwersa ng AFP at PNP. Ang mga operasyon ay bahagi ng pagpapatuloy ng kontra-rebolusyunaryong pakana ng Rehimen US-Estrada: ang Oplan Makabayan.

Mistulang Batas Militar sa Kanayunan

Ang operasyong militar ay tugon ng Rehimen US-Estrada (RUSE) sa papatinding pagkasuklam ng sambayanan sa naghaharing sistema. Ito ang isinagot ng pamahalaan sa pagtutol ng mga mamamayan sa mga patakaran ng rehimen sa ekonomya katulad ng liberalisasyon, pribatisasyon at deregulasyon. Tinututulan ng mga mamamayan ang mga patakarang ito dahil ito ay tanikalang gumagapos sa kanila sa walang hanggang kahirapan at pambubusabos ng mga dayuhan at lokal na mapagsamantala.

Pandarahas din ang tanging sagot ng rehimen upang makapanatili sa kapangyarihan. Ito'y sa harap ng pagkasuklam ng mamamayan di lang sa mga patakarang pang-ekonomiya ng rehimen kundi sa palalanang-papalalang korupsiyong lumalamon sa rehimen.

Subalit ang malalang krisis sa ekonomiya at ang pagkasuklam ng sambayanan sa rehimen Estrada ang



nagturo sa mamamayan na walang ibang solusyon kundi ang makibaka at sumalig sa lakas ng rebolusyon.

Kaya't dito sa TK, kung saan dramatikong sumulong sa lahat ng panig ang rebolusyon sa nakaraang limang taon, inilagak ng pasistang rehimen ang mahigit sa 13 batalyong panagupa ng AFP. Ang mga tropang ito ang naghasik ng matinding pandarahas sa mga sona at larangang gerilya ng rehiyon. Mistulang ipinatutupad ng rehimen ang Batas Militar lalo na sa kanayunan.

Pangunahing Target

Inilulunsad ang mga operasyong militar pangunahin upang lumikha ng ilusyon ng katatagan ng estado. Hinahadlangan ng mga operasyong ito ang mahigpit na pagkakaisa ng mamamayan sa kanayunan. Sa pamamagitan nito ay naipakikita nilang sila ang may kontrol sa sitwasyon.

Mga yunit ng Bagong Hukbong Bayan ang target ng kanilang mga operasyon. Pero ito ang mga yunit

Sundan sa kasunod na pahina ►

◀Mula sa nakaraang pahina

na laging kasalamuha ng mamamayan sa kanayunan araw-araw. Ito ang yunit ng hukbo na nagtuturo sa mga kabataan upang mahango sila sa kawalang pag-asa. Ginagabayan nito ang mga kababaihan upang malaman ang kanilang karapatan nang sa gayo'y hindi na sila mabiktima ng mga nais manlamang sa kanilang kahinaan. Tinutulungan nila ang mga magsasaka na tuklasin ang katotohanan sa kanilang buhay upang kaipala'y baguhin ang kanilang aping kalagayan.

Ito rin ang mismong hukbo na tumutugon sa mga praktikal na pangangailangan ng mamamayan na hindi naaalalang ipagkaloob ng reaksyunaryong pamahalaan. Mandirigma sila ngunit sa isang takdang panahon ay mga manggagamot rin. Naglulunsad sila ng serbisyong medikal para sa mga walang kakayanang magbayad sa mahal na serbisyo ng isang doktor lalo na sa mga liblib na pook. Malaki rin ang ambag ng mga yunit na ito sa pag-aangat ng antas ng literasiya sa kanayunan.

Totoong armado sila dahil sila ay mga rebolusyunaryong mandirigma. Pero totoo rin naman na ang kanilang mga armas ay laan sa pagtatanggol sa mamamayang inaapi't pinagsasamantalahan at para sa preserbasyon ng kanilang mga sarili dahil laging naroon ang panganib na sila ay salakayin ng mga bayarang hukbo ng mga reaksyunaryo.

Sa paglulunsad ng mga militar at pulis ng mga kampanya sa pagkubkob at paglipol sa mga yunit na ito, sinisigurado nilang may mga nadadamay na mga ordinaryong mamamayan. Naghahasik sila ng takot sa mga masang sumusuporta sa hukbong bayan sa anyo ng masaker, pambubugbog, paninira ng ari-arian at iba pa. Walang patumanggang paglabag ng mga mersenaryong tropa ng rehimen sa karapatang pantao ang idinulot nito.

Malinaw na paglabag ang mga ito sa Kumprehensibong Kasunduan sa Karapatang Pantao at Internasyunal na Makataong Batas (CARHRIHL) sa pagitan ng Gobyerno ng Republika ng Pilipinas (GRP) at Pambansang Demokratikong Prente ng Pilipinas (NDFP).

Malinaw rin na sinadya ang pamiminsala sa mamamayan upang takutin sila at sa gayon ay mapigilan sa pagrerebolusyon.

Narito ang mga talang mga bagong kaso ng paglabag sa CARHRIHL ng Rehimeng US-Estrada mula Enero hanggang Marso 2000 sa Rehiyong Timog Katagalugan:



Enero 11, Laguna

Dinakip ng mga tauhan ng 9th Scout Ranger Company sa pangunguna ni Lt. Behado sina Armingol Trinanez, 54, may asawa ng Barangay Balian, Pangil at Leopoldo Matienzo, Jr., 19, ng Barangay San Antonio, Kalayaan. Ang dalawa ay nagpapahinga nang madaanan ng mga elemento ng Scout Ranger. Sila ay pinagbintangang mga miyembro ng NPA at nang magpaliwanag na sila'y mga magsasaka lamang ay agad na tinadyakan ng namumuno sa mga militar, kinulata ng ripleng armalayt at sapilitang isinama sa kanilang detatsment sa Siniloan.

Ang dalawa ay dinala sa Camp Kapatalan at nananatiling nakapiit dito. Ayon sa mga kamag-anak na dumalaw, namamaga ang mukha ng dalawa sa kabubugbog ng mga militar.

Dagdag pa rito, pinagbabaril ng mga nasabing militar ang isang kalabaw ng isang magsasaka sa lugar at ginawa itong pulutan.

Enero 20, Oriental Mindoro

Isang *strafing operation* ang isinagawa ng tropa ng Alpha Company ng 49th IB PA, sa pamumuno ni Capt. Luisito Perez at Philippine Marines sa pamumuno ni Capt. Montojo. Ang mga tropang ito ay nasa ilalim ng Task Force Seagull na pinamumunuan ni Col. Carlito Gamit. Ang pamamaril ay isinagawa sa isang pamayanan ng mga Mangyan sa Sityo Tambangan, Brgy San Juan, Bulalacao. Nasira ang ari-arian ng mga biktima at tinakot silang huwag magpapatuloy ng mga NPA.

Sundan sa kasunod na pahina ▶

◀Mula sa nakaraang pahina

Enero 29, Oriental Mindoro

Isinalbeyds ng mga elemento ng 5th Scout Ranger Company (SRC) sa pamumuno ni Capt. Luisito Perez si Armando “Ka Sixto” Cerna, Jr., 45, isang kilalang NPA. Ayon sa mga saksi, buhay pa siya nang mahuli ng mga militar at ang tangi niyang sugat ay sa may pulso lamang. Subalit walang awang pinatay ang mandirigma. Nilaslas ng mga walang pusong militar ang kanyang braso upang maubusan ang biktima ng dugo at nang mabagalan sa pagkaubos ng dugo ay binali pa ng mga kaaway ang kanyang leeg. Ito ang naging sanhi ng kanyang kamatayan.

Unang linggo ng Pebrero, Oriental Mindoro

Sa isang operasyong militar na idinaos sa mga baranggay ng San Antonio at Alcate sa bayan ng Victoria, 33 pamilya ang napilitang lumikas. Ilang bahay ang hinalughog nang walang *search warrant* at anim sa mga bahay na ito ang sinira ng mga militar. Kinumpiska ang mga gamit sa loob ng mga naturang bahay. Nagpatupad din ang mga militar ng *curfew* sa Brgy. San Antonio.

Pebrero 14, Quezon

Pinatay ng mga pinagsanib na puwersa ng 17th SRC ng Southern Luzon Command (SolCom) - Task Force Banahaw at PNP Special Action Force (SAF) na pinamumunuan nina Lt. Montano B. Almodovar at P/Insp Baccay ang apat na magsasaka na sina Narciso Aramil, Nida Dismaya, Lordiano Lucena, at Ramon Sabungko. Ang apat ay pinaratangang mga miyembro ng NPA. Ang karumal dumal na krimen ay naganap sa Ilog Liyang, Brgy. Lumutan, Gen. Nakar.

Naghahanda ang apat ng biktima para sa kanilang trabahong pangangahoy nang biglang paulanan ng bala ng mga militar ang kanilang tinutuluyang bahay na kaagad na ikinamatay ng mga ito. Sinunog din ng mga militar ang bahay at mga kagamitan sa loob nito kasama ang isa’t kalahating kabang binhi ng palay. Sinira pa ng mga militar ang pananim na bawang at kamote ng mga biktima.

Kinabukasan bandang 11:00 ng umaga, dinakip ng mga naturang militar sina Fernando Balutong, Ferdinand Duliente, at Manolito Gurango. Ipinailalim sila sa mahigpit na interogasyon at sapilitang isinama sa Sitio Nayon, Brgy Santa Ines, Tanay, Rizal. Lampas na ng ika-lima ng hapon nang sila’y pakawalan ng mga militar.

Pebrero 15, Laguna

Matapos ang isang ambus na isinagawa ng Bagong Hukbong Bayan (BHB) sa Mabitac laban sa mga elemento ng 9th SRC, dalawang sibilyan ang hinuli ng mga militar kung saan ang isa ay nawawala pa rin hanggang sa kasalukuyan.

Huling dalawang linggo ng Pebrero - Marso, Oriental Mindoro

Sa reaksyon ng mga tropa ng pamahalaan sa pamamarusa ng BHB kay Mayor Oscar Aldaba ng San Teodoro, walang patumanggang operasyong militar ang inilunsad ng mga tropa sa ilalim ng Task Force Seagull. Tumagal ang operasyon hanggang sa huling linggo ng buwan ng Marso. Dulot nito, maraming pamilya sa nasabing bayan ang napilitang lumikas.

Tala ng mga paglabag sa karapatang pantao ng Rehimeng US-Estrada sa pagtatapos ng taong 1999 dito sa rehiyong Timog Katagalugan

101 biktima sa 37 kaso ng iligal na pang-aaresto
14 na biktima sa 5 kaso ng torture
23 biktima sa 5 insidente ng masaker at frustrated masaker
8 biktima ng salvaging at frustrated salvaging
4 na biktima ng sapilitang pagkawala
242 biktima ng harassment
177 pamilyang nabiktima ng sapilitang paglikas
6 na kaso ng pagkumpiska ng ari-arian
3 kaso ng pagkasira ng ari-arian

Pinagmulan: KARAPATAN-Timog Katagalugan

Isang sibilyan ang hinuli’t ikinulong ng mga militar sa simpleng paghihinalang siya ay kasama sa mga nagparusa sa mayor kahit walang matibay na ebidensiya. Dagdag pa rito, isang lider magsasaka ang kinasuhan ng pagpatay kay Mayor Aldaba at hinahanap ngayon ng mga kaaway. Ito’y sa kabila ng kawalan ng ebidensiya sa kaso. **K**

Pinarusahan si Mayor Aldaba

Nagpista ang buong bayan ng San Teodoro, Ori-ental Mindoro nang maparusahan ng lokal na yunit ng Lucio de Guzman Command - Bagong Hukbong Bayan ang kinamumuhiang si Mayor Oscar Aldaba. Maraming masa ang nagpatay ng baboy at bumili ng mamahaling alak para lamang maipagdiwang ang kamatayan ng kinamumuhiang alkalde sa nabanggit na bayan.

Sa isang ispesyal na operasyon, inisparong si Aldaba ng isang yunit ng BHB noong Pebrero 6, bandang alas-9 ng umaga, sa kanyang sariling bayan. Hinintay muna ng mga operatiba ng hukbong bayan na makalabas siya ng simbahan bago pinarusahan. Pagpapakita ito ng paggalang ng BHB sa pagiging sagradong lugar ng simbahan.

Dumagundong sa buong bansa ang matagumpay na pamamarusa ng BHB sa nasabing alkalde. Ipinakita nito ang kakayahan at kapasuhan ng BHB na parusahan ang mga may utang-na-dugo sa mamamayan, gaano man ito kamakapangyarihan. Nagsisilbing babala ito sa mga sagad-saring kontrarebolusyunaryong may utang na dugo sa mamamayan, na kaya silang abutin ng rebolusyunaryong kilusan anuman ang kanilang kapangyarihan, saanman sila naroroon.

Si Aldaba ay nasa pangalawang termino na ng pagkaalkalde sa nasabing bayan nang siya ay maparusahan. Nagawa niyang manalo ulit sa nakaraang eleksyon sa pamamagitan ng paggamit ng lansakang pandaraya, pananakot at pagpatay. Siya ay dating mayor ng PA at opisyal sa paniktik bago tumakbo sa pagkamayor.

Siya ay sagad-saring kontrarebolusyunaryo na aktibo sa paglaban sa rebolusyunaryong kilusan sa loob ng nasabing bayan at sa mga karatig nito. Noong 1998, siya mismo ang humiling na mataas na koman ng AFP na magpakat ng pwersang militar sa San



Teodoro. Itinalaga rito ang 14th SRC, at kalaunan ang iba pang yunit ng SRC at PA, na gumalugad sa buong bayan at karatig nito, at puminsala sa buhay, kabuhayan at ari-arian ng mamamayan. Nitong Pebrero bago siya maparusahan, humiling naman siyang magtayo ng isang detachment ng kaaway sa nasabing bayan. Bago nito, mayroon nang nakapwestong isang seksyon na SAF-PNP na nagsisilbing sekyuriti niya at nag-ooperasyon laban sa mga yunit ng BHB sa lugar.

Dagdag sa kaso niya ang pagpapapatay sa isang lider-masa noong nakaraang eleksyon dahil lamang sa nangangampanya ito para sa kanyang kalaban sa pulitika.

Marami pang ginawang panghaharas at pananakot si Aldaba sa mga mamamayang lumalaban sa kanyang pasistang pamumuno sa bayan. Aktibo ang mga pulis at militar sa paghahasik ng terorismo dahil sa utos ng nasabing alkalde.

Huwaran ang ginawang pagpupursige ng mga Pulang operatiba na parusahan si Aldaba sa gitna ng walang habas na mga operasyong militar ng mga yunit

Sundan sa kasunod na pahina ►

Ipinakikilala: ang...

Alab ng Digmang Bayan

Isa na namang album ng mga rebolusyunaryong kanta ang nairekord ng Artista at Manunulat ng Sambayanan - Timog Katagalugan (ARMAS-TK): ang Alab ng Digmang Bayan. Ang 'Alab ng Digmang Bayan' ay koleksyon ng mga awiting umantig sa damdamin at imahinasyon ng mga rebolusyunaryong Pilipino noong maagang yugto ng dekada '70 hanggang sa unang mga taon ng dekada '80.

Sinulat at pinalaganap ang mga awiting ito kasabay ng pagpupunla at pagpapalawak ng rebolusyunaryong kilusan sa rehiyon. Tinipon at inirekord ito sa pakikipagtulungan sa Pambansang Kawanihan sa Kultura ng Partido Kumunista ng Pilipinas. Binigyang buhay nito ang walang kamatayang awitin ng rebolusyong Pilipino.

Napapanahon ang paglalabas ng album dahil nakapagpanibagong-lakas at -sigla na ang rebolusyunaryong kilusang pinamumunuan ng Partido sa gabay ng IDKP. Ayon sa Komite ng Partido sa Rehiyon, "...Napakahalagang ipalaganap ... ang mga saligang prinsipyo ng Partido at rebolusyon na ninais ibaon sa limot ng mga luma at bagong rebisyunistang taksil na

nagdala sa kapahamakan at dis-oryentasyon ng rebolusyon." Marami sa mga prinsipyong ito ang pinapaksa ng mga awit sa album.

Ito ang ikalawang album ng mga rebolusyunaryong awit na nairekord at ipinalaganap ng ARMAS -TK. Nauna rito, noong 1996 ay inilabas nila ang 'Dakilang Hamon'.

Noong Disyembre 1999, sa isang larangang gerilya sa rehiyon, naglunsad ng programa ang mga kasapi ng ARMAS-TK upang pormal na ipakilala ang 'Alab ng Digmang Bayan'. Inumpisahan doon ang pagpapalaganap ng album para marinig ng mamamayan ng Timog Katagalugan. Ang programa ay dinaluhan ng mahigit 500 mamamayan na nagmula pa sa iba't ibang lugar.

Ang paglalabas ng album ay isa na namang malaking hakbang sa pagsusulong ng rebolusyong pangkultura at sa mismong demokratikong rebolusyon ng bayan. Asahan natin na sa susunod na panahon ay higit pang mag-aalab ang digmang bayan hanggang tuluyang maibagsak ang malakolonyal at malapyudal na lipunan at maitayo ang isang lipunang tunay na malaya at walang pagsasamantala ng tao sa tao. **K**

◀Mula sa nakaraang pahina

ng SRC, 49th IB at SAF-PNP sa San Teodoro at mga karatig nito. Higit pa, nagawang parusahan si Aldaba sa sentrong-bayan, ilampung metro mula sa himpilan ng pulisya, kung saan inaasahang pinakamalakas ang kontrol at depensa ng kaaway.

Subalit hindi naging madali para sa mga operatiba ang pagpaparusa kay Aldaba. Ilang linggo munang nagmasid at ilang ulit munang nagtangka ang yunit ng mga operatiba habang umiiwas sa operasyon ng kaaway bago nila tuluyang naparusahan ang pusakal na alkalde.

Hindi natunugan ng kaaway ang presensya at operasyon ng mga operatiba ng Pulang hukbo sa loob

ng ilang linggo sa mismong sentrong bayan dahil sa malawak na pagsuporta ng mga taumbayan. Matagal na nila itong hiniling sa BHB at ibinigay nila ang lahat ng kanilang makakaya upang maparusahan lamang si Aldaba - bahay, pagkain, suportang materyal, at laluna, datos-paniktik.

Nagtagumpay ang pamamarusa kay Aldaba dahil sa matibay na kapasyahan ng BHB na natugunan ang kahilingan ng masa, sa mahigpit na pagtalima sa kilos-gerilya, sa mahusay na pagpapalano at pagpapatupad nito, at ang pinakamahalaga, sa malawak na suporta ng masa.

Isa na namang tinik ang nabunot sa landas ng rebolusyon. Tiyak na masusundan pa ito! **K**

Dating PC Major, Sinalisihan

Marso 4. Nag-iinom at nagpapasarap si PC Maj. Rosendo Arriola (ret) sa isang restawran sa Poblacion, Baco, Oriental Mindoro. Sa kanyang bahay, sa di kalayuan, ay nililimas naman ng mga operatiba ng BHB ang mga armas at samu't saring gamit militar.

Ang matagumpay na operasyong salisi ng yunit ng BHB sa nasabing bayan ay nagdagdag na naman ng mga bagong sandata sa lumalaking arsenal ng BHB.

Nasamsam sa inilunsad na operasyon ang isang ripleng M16 bulldog (Elisco), isang 5-shooter na ripleng






Browning shotgun, mga magasin ng armalayt, mahigit na 800 bala para sa M16 at iba pang gamit militar.

Susi ang masigasig na pagtulong ng masa sa pagkakahon sa target at paglahok sa mismong operasyon sa tagumpay ng taktikal na opensiba. ❧

Bahay Ng Mag-amang Pulis, Ni-reyd

Isang matagumpay na reyd/ lalang ang inilunsad ng isang yunit ng BHB noong

teka-teka





Pebrero 15 laban sa mag-amang pulis sa Sityo Tahik Baruyan, Calapan City, Oriental Mindoro.

Si SPO3 Alvin Albania at ang kanyang amang dating pulis sa Roxas, Oriental

Mindoro at kagawad ng “Mayor’s Action Team” ay matagal nang inirereklamo ng mga mamamayan sa paligid dahil sa walang habas na pagpapaputok ng baril tuwing nalalasing.

Nagkunwaring bibili ng gasul ang mga operatiba ng BHB upang mapasok ang bahay at manyutralisa ang matandang Albania. Itinaon ng yunit na wala si Alvin habang inilulunsad ang operasyon.

Nasamsam ng BHB ang isang ripleng M16 armalayt, dalawang kalibre .45 pistola (1 Llama max na may stabilizer at 1 Colt 1911), at isang kalibre .38 Armscor rebolber.

Kasama sa mga nasamsam ang dalawang magasin ng kalibre .45 pistola, 20 magasin ng M16, dalawang *rifle grenade*, mahigit sa 400 bala ng M16 at .45 at iba pang gamit-militar. Hindi kinumpiska ang mga alahas at salapi ng nasabing pamilya.

Bagamat labas sa *area of responsibility* (AOR) ng nag-operasyong yunit ang target, nagpasya ang kumand ng yunit na ikasa ang operasyon dahil sa maraming reklamo laban sa mag-ama at sa masigasig na pagkilos ng masa para ikahon ang target.

Natuwa ang masa sa tagumpay ng operasyon ng BHB. Umani rin ng di mapasubaliang paghanga mula mismo sa target ang mga operatiba dahil sa kanilang pagiging magalang sa kondukta ng operasyon at sa hindi pagkuha sa alahas at salapi ng nasabing pamilya.

Walang nahagip ang mahigit 30 pulis-Calapan na nagresponde sa gabi ring iyon. **K**

Scout Ranger, Inambus

Nabira sa wakas, sa isang maimpak sa pulitikang taktikal na opensiba, ang mga palalong tropa ng 9th Scout Ranger Company (SRC).

Isang ambus, na inilunsad noong Pebrero 15 sa Bgy. Amuyong II, Mabitac, Laguna, ang sumugat sa isang elemento ng 9th SRC. Napatay rin dito ang isa pa nilang sundalo.



Umani ito ng malaking tagumpay sa pulitika. Nagsilbi itong sagot ng rehiyon sa pa-machong tindig ng rehimeng US-Estrada na tumatangging makipagnegosasyon sa Pambansa Demokratikong Prente ng Pilipinas (PDPP). Bukod pa sa pagtangga ng rehimen na ihinto ang mga operasyong militar sa rehiyon upang bigyang daan ang pagpapalaya sa dalawang bihag ng digma (POW) na hawak ng Melito Glor Command (MGC).

Naging bahagi ito ng pagsisikap na ilunsad ang mga taktikal na opensibang kakayanin. Bahagi rin ito ng paniningil sa pasistang rehimen sa mga karumaldumal na krimen at iba pang atosidad na inihahasik nito sa buong rehiyon ng Timog Katagalugan.

Pulis, Inagawan Ng Armas

Ni-reyd ng yunit ng Bagong Hukbong Bayan (BHB) sa Mamburao, Occidental Mindoro ang bahay ng kabit ng isang kagawad ng pulisya noong Enero 4.

Isinagawa ng yunit ng BHB ang reyd sa Brgy. Fatima ng masabing bayan, habang si SPO4 Toto Corpuz ay dumadalaw sa kanyang kabit. Nasamsam ng BHB ang *service firearm* ng pulis na isang kalibre .45 pistola, magasin at pitong bala.

Habang isinasagawa ang reyd, si SPO4 Corpuz ay nagtangkang lumaban. Nasugatan ang isang operatiba ng BHB ng barilin niya ito. Dahil doon siya ay pinaputukan ng iba pang operatiba na kanyang ikinamatay.

Si SPO4 Corpuz ay elemento ng 408th PMG-PNP na nakabase sa ikalawang distrito ng kanlurang Mindoro.

Ayon sa ulat-koresponsal ng larangang gerilya sa kanlurang Mindoro, ang reyd ay tugon ng yunit ng BHB sa nasabing bayan sa panawagang “maglunsad ng mga makakayanang taktikal na opensiba at dagdagan ang sandata sa arsenal ng BHB.” **K**